

77
16
DEO OPTIMO MAX.

UNI ET TRINO,

VIRGINI DEI - PARÆ, ET S. LUCÆ
Orthodoxorum Medicorum Patrono.

QUÆSTIO MEDICO-CHIRURGICA,

QUOD LIBETARIIS DISPUTATIONIBUS
*manè discutienda, in Scholis Medicorum, die Mercurii vigesimo-
quinto mensis Martii, anno Domini M. DCC. L.*

M. LUDOVICO-PETRO LE HOC,
Doctore Medico, Præside.

Utrum cautissimi debeant esse Medicus, Chirurgus, præsertim in Cancro curando.

I.



CANCER Καρκίνος, Καρκίνωμα, morborum funestissimus, cujus origo, causæ, symptomatibus, hunc remediis blandiri vix licet & cum pessimis ægri rebus ferè semper terminatur; paucioribus verbis circumscribi nequit. Acuto sensu donatas partes affligere amat; caput, mammas, genitalia, digitorum extrema, articulos, adoriri fere perpetuum est; alibi cum observatur, sæpiùs degener, minus periculi infert; interiora rariùs depascitur, ea saltem loca quæ aër non

alluit & si in intimis corporis partibus Cancer aliquando observatus fuit, membranaceas, nerveas, quales sunt mesenterium, vesica, &c. afficit, vel illas quæ lymphæ dicantur, sic Pancreas; in Renibus vix unquam repertus, hinc non absonum erit concludere, Cancrum è systemate nerveo & lymphatico, originem suam ducere. Mammas frequentissimè devastatur; illæ sexui utrique concessæ, vix quidquam in masculis præstant, si Depilos & vere fœmineos exceperis, quos ut lacte, sic & Cancris aliquando donari observatum est. Mulieres viro maturæ his præsertim dotantur. Frequentioris Cancris in mammis causa, ex illarum situ, structurâ & usu erui debet. 1°. Quidquid ab extra mâli provenire potest, huic subjacent, aliundè vasorum majorum & viscerum vapore & calore destitutæ. 2°. Vasa omnis generis, illarum structuram ingrediuntur, lymphatica, Galactophora vasis sanguiferis contigua, lac secernunt, folliculosè dilatata asservant, intra papillam arctius plicata & constricta, ab exitu prohibent, per areolam hiantia, ad usum infantis lac fundunt. Si glandulas aliquot, plerumque subcutaneas, cellularem, nervosum, spongiosum, contextum haud absimilem penis aut clitoridis texturæ, addideris, interiorem mammæ substantiam habebis; huic multiplices arteriæ subjacent, hanc plurimæ venæ ambiunt, pauciores verò interius gerit. Commmercium facile, vasorum inter se, valvulas abesse probat. Mammas exquisito sensu donari, quis negat; illarum cum utero sympathia, Hippocrati jamjam perspecta erat, talis est, tam accuratè reciproca, ut huic explicandæ, anastomosis decantata, vasorum nempe mammariorum cum epygastricis, nervorum mammariorum cum uterinis per sympathicum majus, impar sit. Observatum est Mulieres, quibus lac semper defecerat, virgines, quin & viros, lac diu & ardentè optatum tandem obtinuisse, juvantibus ut credere est, suctione & attrectatione, egregiis ad id stimulis, quæ tamen mentis in mammis actionem aliquantulum probant. 3°. Usus mammæ si intuearis, hæc ab infante frequentius proritata, suaviter quidem, nec sine prudentis Naturæ intentione, lacte turgida, mox depleta, tonum tandem amittet, facilis hinc humorum stagnatio. Lac parvâ præsertim copiâ hærens, induratum, lymphæ item,

skirrosus tumorem producent; quem voluptuosa nimis, sæpiusque repetita attrectatio, inflammatoria à lacte distensio in Cancrum convertent; utrumque ergo in dispositione cancrōsā cautē faciendum. Quid ex cognitā probē structurā mammæ, tumor in illā mali inferre valeat, sat perspicuum est; genuinam verò Cancri indolem, peculiarem causam exindē eruere difficillimum. Palam aliquando facient observata, quæ abstrusa nimis, adhucdum dolemus. Interea cautissimē in Cancro curando procedamus, ejus enim causæ, origo, progressus, symptomata multifariā impli- cantur, sæpē variant, partes structuræ intricatissimæ afficit, ejus symptomata leviori de causā exacerbantur, difficilē mitigantur, difficilius auferuntur, dolores acutissimi, curatus semel, citō & ferocius repullulat, ægrotantem sæpius necat.

I I.

NEC satis est partes Cancro veluti proprias subindicasse. Rei momentam exigit ut quā se prodat facie, quibus larvis aliquando incautum decipiat, num ex genio partis affectæ, peculiarem characterem induat, apprimē noscatur. Ita ut hunc in ortu detegere, eradicari, notis symptomatibus, periculis, obviam ire valeamus, saltem ne quod sæpius accidit, ignoto perversam Therapeiam adhibeamus. Quæ paucissima hīc subjicimus, ex observatis Authorum probæ fidei collatis inter se deducuntur, vulgatissimum Cancri processum designant. 1°. In facie orditur sæpe sine tumore, sæpius cum tumore vix manifesto, sæpius lato, non ita bene circumscripto, paulatim duritiem inæqualem acquirit, pruriginosē dolet, cutis cui subjacet tumor, rubet, sublutea fit nonnunquam, erysipelatis more, livescit, pustulis operitur, quorum apex saniem fundit, affectum *cu-perossa* dictum haud malē diceret, tandem ulcus fit, latē serpens, granulatum, punctis nunc albis, nunc verò sanguineis interspersum; acutissimē dolet, periodos suas sat citō absolvit. 2°. Labrum inferius haud rarō disruiat, gingivarum scorbuticā dispositione ut plurimum comitante. 3°. In interiori narium, gulæ, alveolarum, maxillæ superioris, præsertim ab avulsione dentis molaris, vaginæ, polypum, fungum mentitur, his accrescit, hæmorrhagias exitiales numerō infert, minis acriter dolet & tempora sua tardiùs lustrat. 4°. In gingivis hyperfarcosim æmulatur, huic adnascitur, diù stat immutatus, dolores urgent, gingivæ scorbutō deturpantur. 5°. In oculis, carunculæ, idatidis formam induit, hi affectus in Cancrum faciliē abeunt, ex admotis v. g. causticis; lentē satis procedit, pertinacissima cephalalgia ægrum vexat, hæmorrhagiæ haud infrequentes, in tumorem sæpē intensum affurgit, sub solani esculenti formā. 6°. In parte pilosā capitis, in articulis, lupiam simplicem, primā fronte diceret, hanc remediis potissimum vexatam inficit, lentē crescit, acutissimos dolores cum totius articuli tumore & inflammatione infert. 7°. In facie, in labio, pene & horum vicinis, verrucam refert, ex illā originem ducit, ulceratus semel citissimē tempora sua absolvit, acutissimē dolet. 8°. In mammis glandulam nunc triangularem, rotundam, oblongam diceret, in eodem statu per plures annos aliquando viget, accedente tandem irrimento quocumque, augetur, prurit, dolet, vasa vicina, communicantia, nervi huic prospicientes, glandulæ contiguæ admissā labe infarciuntur, plus vel minus, citius aut tardiùs tumorem figunt, multiplicem formant, vel simplicem extendunt, crescit interea tumor, elevatur, acutius dolet, integra ad axillam usque manima tumet, quin utraque aliquando intumescit, cum ipso brachio, cujus motus difficiles, dolorem augent; cutis minutior evadit, rubet, livescit, varicibus circumquaque recurvis obregitur, quæquidem Cancris omnibus propriæ, in mammis verò frequentiores, Cancri nomen præprimis dēdere, occultum in illo statu Cancrum Medici pronuntiant. Sanies acris, foetens, stillat aliquando per hiatus papillæ, cutis tandem finditur, ichorem corrosivum, tetrum fundit, fissura ampliatur, oræ recurvantur, fungosē tument, epiderma circumambiens facillimē à cute quandoque secedit, ulcus granulatum sanguine interspersum, cartilagineam, corneam subrubescens substantiam granulatim dispersam exhibet, lividum fit, circularem, ut plurimum formam tentat, *de cul de poule*, visu fœdissimam, Cancrum adartum tunc dicunt Syncope, dolores, febris hectica, sudores nocturni, fluxus alvi, hæmorrhagia ut plurimum ægram consumunt. Hæc est abstrusissimi & teterrimi morbi imago.

I I I.

HEREDITARIA labes, contagium, cœli temperies, puta aër marinus, suppressæ evacuationes hæmorroidum, menstruorum, feminis; temperamentum atrabilarium, melancholicum, inanis ad venerem salacitas, affectus animi vehementiores, victus è cibis acrioribus, potus spirituosus, exercitia validiora, lactis intropulsio, generaliores Cancri causas constituunt; mille tamen observatis constat, Mulieres aliundē optimā sanitate gaudentes Cancro vexari, quo solo exesæ obierunt; inde speciale quoddam morbi genus Cancer constituere videtur. Positā præsertim aliquā è causis generalioribus, plurima Cancrum accersent, sic contusio, usus internus, externus remediorum acriorum, repercutientium, coagulantium, frictiones, sectio præpostera tumoris nervei & alia bene multa. quæ ex situ, structurā & usu partium haud difficilē eruentur. Skirrus inflammatus, ulceratus, ad certam molem auctus, Cistim rumpens, inflammans, exulcerans, vicina premendo, dolores, inflammationem produciens, ut vulgatissima & proxima Cancri causa habetur, à plurimis Authoribus melioris notæ; quæ si de skirro non exquisito intelligant, annuimus. Interiora

raro premit Cancer, cum externis injuriis & præsertim aëri non pateant, quid enim damni aër vulneribus inferat, quantum putredinem juvet, vix credere est. Morbis plurimis implicatum Cancrum Medici observaverunt, scorbutus, scrophulæ illum haud raro comitantur; ossium fragilitas cum siccitate, hujus comes aliquando visa fuit. Sed quid hæc, innumera observata evincunt hunc nullo alio vitio circumfultum existere. Num inde eandem esse scorbuti, scrophularumque Therapeiam, cum Cancro accusarent? Cave credas, ne probes, in Cancro saltem aperto, cujus dolores, cum febre hecticâ, comites erunt, quam infausta perversam hanc methodum secuta sunt. Id unum certum est, Cancros plurimos, immaniter jamjam sævientes, adhibitâ causâ, variatâ medelâ curatos fuisse, ita ut inde paucissimos conclamatos esse probatum sit.

I. V.

TUMOR adhuc dum schirrosus, omni ope resolvendus, cautius semper probanda sunt remedia, in tumore, cujus situs, figura, sive etiam generalior Cancrorum causa jam præsens, futuri Cancri suspicionem injicient. Itaque venæ-sectione, purgantibus pro re natâ, præmissis, resolutiva post modum adhibenda sunt, à mitioribus ordiendo, sic mercurius à leviori dosi ad proximam usque salivationem probatus feliciter fuit, ad validiora quandoque progrediendum erit, habitâ ratione ætatis, temperamenti, &c. Interea colatoria corporis quælibet referenda sunt, humorum fervori occurrendum. Experientiâ jamdudum constat, Mulieres plurimas, tumore sæpè jamjam Cancroso afflictas, tum integrè sanatas fuisse, tum etiam annosam satis vitam, dicam incolumes, protaxisse, usu solo remediorum superius assignatorum, diù satis continuato; plurimas autem quæ illorum jam per multos annos efficaciam ita feliciter probaverant, ut omninò sanatas se crederent, illis tandem neglectis sæpè absolutè ommissis, Cancro immaniter sæviente, vel etiam morte, delictum Medicum piaverunt. Quid mercurius ferro arte unitus valeat probent Medici. Si quis audax nimium, invitis tot rationum momentis, meticulosos nos dicat, *Hippocratem* adeat quæso & ab illo quotquot in arte Medicâ excellere, *Boërhaavii*, celeberrimi ejus discipuli opera meditetur. Paulum *Æginetiam* consulat, qui morbos, credam sæpè leviores, ferro & igne urgebat, Chirurgicam Cancri curationem, aggredi vix suadet. Plurima tamen sectionis usum in Cancro commendant, hanc, felicissimus, cautiissimusque simul experientiâ suâ probat *Fabricius Hildanus*. Incassum tentatis remediis, tumorem auferendum tutò pronuntiamus, si præsertim congenitus non sit, si corporis interiora hac labè immunia sint, si totus sive sectione, causticis, igne, aut suppuratione eradicari possit, parti, quam attingere periculum foret, intimius non adhæreat, permittantque ægri vires. Sat tutò auferetur, si sat citò. Neque in curando Cancro ferrum, caustica, ignis absque delectu adhibeantur. Si tumor omnis, illiusque radicibus, & ceteris superstitibus, suppuratione postea aut causticis, radicibus auferendis, toties ferrum sit in usu. Scalpello ad id instruat Chirurgus, illo radices, cum tumore, tutius faciliusque secabit. Infida forceps, plurima importat incommoda. Nec laudo perpetuam brachii lateris ægri in operando elevationem, naturalem fibrarum musculi pectoralis situm pervertit; radices Canceri, si quæ sint, nec observari neque exseindi facile hinc possunt. Brachii extrorsum diductio, tumorem & cutim sufficienter firmaret; sæpè brachium relaxari conducet. Plurimi inter operandum, cuti parcendum suadent; ignis, causticorum, usum omnem reformidant; vasa tumori vicina, tetro sanguine infarcta, aliquali hæmorrhagiâ referari non sinunt, vulneris oras futurâ, fasciis stringunt, cicatricem quam Citam jactant, pro viribus accelerant; sed non ne stolidum est cicatricis deformitate, leviori hæmorrhagiâ perterreret, Cancri verò redituri, periculum incurrere; nimè satiùs est causticis, igne, radices averruncare. Alii radices Canceri fictitias esse propugnant, quas tamen, funestissima sparsim ab Autoribus annotata nimis certò probant. Qui cuti parcendum suadent, ex observatoribus discant, quàm sæpè improbâ hac cautelâ, Cancer non penitus excisus, in cute attentius relictâ, vel ejus viciniis ferocius, ut moris est, repullulaverit. Qui citam cicatricem optant, sciant illam sapius callosam, dolentem ita remansisse; usque dum immaniùs Cancer in ipsâ de novo sævierit. Copiosa satis suppuratio servanda, parciore proritanda, suppressæ, finitæ, cucurbitulæ, scarificationes, cauteria vices gerant, quæ in imminente Cancro egregia præstant; ne tamen vicino nimis tumori applicentur, Cancrum sic excitasse observata probant. Si aliquando copiosior suppuratio fuerit, tum mitiganda venit. Quemadmodum Cancer, sic neque radices, eadem ubique methodo curandæ sunt. Quædam insequi periculum foret, illæ nempe quæ ad interiora usque viscera pergunt, quales in pectoris cavum penetrantes observatæ sunt, quod si præscire datum sit, sive sputis, tussi, aut aliis signis, pro viscere affecto, à Cancri extirpatione prorsus abstinendum: sunt quæ ferro, aliæ causticis, aliæ igni facilius parent. Ferro, quæ visu conspicuæ, intra glandulas vicinas insertæ: causticis quæ intra musculi fibras recunduntur, vel intra adipem latius serpunt. Hæ causticis exesæ, siccatae tutò fuerunt, quas cultro abscindere infausto cum exitu, Chirurgi tentaverant. Ipsemet Cancer causticis aliquando tutius quam ferro sanabitur, quoties nempe ex ossium cavo prodeuns, extra os solummodò secari poterit; ferro tunc si tentetur, irritatus radices difficilius postea curationem admittere & crudelius sævire perpetuum est, causticis verò tumor cum radicibus exultis, in escharam decideret; quod eò etiam facilius succedet, si, ut haud raro

venit, extremitas sola tumoris prominens, Cancro afficiatur, tunc intra tumoris medium, vel ejus radices, immissa, egregiè proderunt, quod experientiâ confirmatum est. Caustica toties etiam præferenda sunt, quoties multiplices nimis radices, quas cepæ radicibus haud absimiles quondam observaverunt Medici, difficillimum foret omnes cultro excindere, causticum intra illorum nervos, vasa dilatata ingrediens, virûs intra illa contenti, energiam intrinset & illas in escharam haud difficilè postea avellendam convertet; his sanè ferrum nusquam supplere valeret. Inter caustica, hæc eligantur quæ mitiora, quatenus licebit; sedantibus, narcoticis intermixta sint. Vix unquam ulceri Cancroso latiori applicentur, saltem validiora, hæc enim eisdem quondam dedere effectus ac si interius propinata fuissent. Nec deest occasio ignem feliciter probandi, quoties peractâ operatione, fungosæ nimium supercrescent carnes, sic etiam quoties intra ipsam ossis substantiam Cancro radices inferentur, tunc admoto igne exfoliatis ossis lamellas cum residuo Cancro viru auferes; sic etiam cum gangræna aderit aut imminet, quod eò facilius succedet, si in primo operationis peractæ instante ignis admoveatur, nisi graviora obstant, tunc enim à doloribus prægressis; sæpè à syncope, æger deliquescens, quælibet Chirurgus permittit; cum è contra ustionis apparatus de novo vix admittet, quam in posterum supercrescentes carnes, tumor parvis operationem subsequens, suppurantis sensus acutissimus præpedient. Sed exteriora secare, urere plerumque non sufficit, serpens interius venenum debellandum est, avertendæ ejus causæ, hæc à superius dictis & assignatis causis eruenda sunt.

V.

SI seriùs ad ægrum convocatus, dira nimis symptomata immedicabilem Cancrum attestentur; tunc ejus progressus, urgentia pericula, prudens avertes; 1°. putredinem arcentibus internè, externè adhibitis, interiora Cancro mitioribus, ejus verò labra validioribus contegantur necesse est. Ægri vires cardiacis levioribus, cibo eupepto erige, doloribus sedantia opponas, hinc opii, Solanorum usus, qui tamen ne diutius protrahatur plurima verant. Quid plumbum externè adhiberetur valeat probabis, interius quandoque usurpandum esse suaderent Medicorum celeberrimorum scripta & praxis; sed cum arsenicale quiddam plumbo inhærere plurima evincant; de quibus vide *Junckerum*, num inde plumbi è lytargirio, &c. redivi & diversè parari, usus internus minùs periculosus erit, quam plumbi calcinationem aut vitrificationem nundum experti. Si ulcus tumidum, molle fuerit, escharotica, vulneraria, leviter stiptica, ægro præsertim phlegmatico cacochymico conducunt; hæc tamen multò minùs proderunt hîc, quam in cæteris ulceribus; Cancer etenim characterem pertinitatis propriæ morbis è systemate lymphatico, aut nerveo oriundis retinet. Mumia *Poterii*, acidula in fotu, vapore, experientia probantur; tunc sæpè symptomata, quæ non occurrunt, omni ope atque operâ allaborandum est. Vasa nempe intra tumorem adhucdum mollem contenta, sinus, alveolos quosdam sibi efformavere, in quibus actioni remediiorum exteriorum vix patent, hinc præpedito per compressionem sanguinis circuitu dilatata, à sanie acriori corrosa, uberrimum sanguinem fundunt, omnemque simul cum vitâ profunderent, nisi linteis carptis, siccis, vel liquore stiptico madidis, absorbentibus, obturantibus, astringentibus, succurrere daretur; stiptica præsertim ne validiora sint, nisi talia summo ægri periculo indicentur; crocum Martis laudat *Ernestus Stahlius*. Illis remediis si Cancrum felix curare non possis, saltem mitigatis doloribus longævam satis vitam red-des. Sint ergo

Cautissimi in Cancro præsertim curando Medicus, Chirurgus.

DOMINI DOCTORES DISPUTATURI.

M. Claudius Bourdier de la Moulière.

M. Petrus Arcelin.

M. Petrus Chevalier.

M. Franciscus Bernard.

M. Joannes le Thicullier, Chirurgiæ Gallico idiomate Professor designatus.

M. Jacobus Verdelhan des Mottes, Scholarum Professor designatus.

M. Iudovicus - Petrus le Hoc, Aëtiæ Præses.

M. Antonius-Nicolaus Guenault.

M. Paulus-Jacobus Malouin, Regiæ Scientiarum Academiæ Socius, & Regius Chemicorum Librorum Censor.

Proponebat Parisiis, **CLAUDIUS - FRANCISCUS GRANDCLAS**, Pontimuffanus, Doctor Medicus Pontimuffanus, nec non Saluberrimæ Facultatis Medicinæ Parisiensis Baccalaureus, A. R. S. H. 1750, à sextâ ad meridiem.